



## Extrait de la revue **SingulierS** du 3<sup>ème</sup> trimestre 2008

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

### Rubrique : **Éditorial**

Tû... Tûte, tûe... Tûte... Â, 'la co in mèsadje ki vint d' ariver dins l' bwèsse arudjstreûse du m' GSM. Choûtans-l' dabôrd : « bonjour, c'est Benjamin Maréchal de La Une télé, qui vous contacte pour l'émission "Au quotidien" ; nous voudrions savoir qui est le concepteur du Wikipedia en wallon sur Internet ; étant de Bruxelles, je ne comprenons pas le wallon, et pour notre émission, nous aimerions lui poser quelques questions, afin de faire une animation un peu spéciale au moment des Fêtes de Wallonie... »

C' èst tous l's-ans piron parèy, ou moumint dès Fièsses du nosse Payis walon, lès djournalisse èt lès gazètîs v's-ouchèt pou awèr dès ransègnmints su nosse walon lingadje. 'La kékes anêyes, duvant ku l' Nèt n' inture dins toutes lès môjons, il invitint lès djins a vnu côser walon ou posse û a vnu s' moustrer al tévé habié d' in sôro èt d' in roudje moutchwa a blancs pwès. Mès asteûre il ont bin trop peûr du lêcher côser lès djins an walon, pace k' i nu l' compurdèt pus, pace k' il ont peûr du n' nin z-esse mwèsse du t't-afwêt... I djèt, adon, k' lès choûteût n' compurdèt pus wêre ; mès l' neûd, di-st-i l' soyeû, c' èst k' i vlèt pus k' on côze walon ou posse, k' on scrîje an walon dins leûs gazètes.

Adon, pou scrîre èn-ârtike su lès Wallons, i purnèt kékes ransègnmints èt vont al pèche ôs-idêyes su l' Nèt, pou arandjer in bokèt a leû manîre, ki n' dène nin la vrê imôdje du nosse lingadje... Alez vèy amon lès Chtis ! K' èst ç' k' i 'nn-ont fwêt du lingadje picard ? In machadje du bon èt d' môvès picard avu du francès, pou sayer d' fwêre rîre... Pou vinde.

Dj' î sans, la wê ! Pou l' djoûr d' ènut', ou cminçmint du vint-èt unîme siêke, c' èst bin l' Nèt, k' èst l' choûr dès informâcions dès gazètîs èt d' ène grande pôrt dès djins, èt la d' bèle amon lès djon.nes. Ç' côp la, c' èst la d'dins k' i fôt s' bôrer èt prinde ène place pou s' fwêre rucouniche et moustrer nosse vrêe valeûr. Dpîs ène d'jin.ne d' anêyes, toutes lès ancyin.nes soces ki ovrèt pou l' walon ont ène vite drovûe su l' Nèt, pou prèsanter leûs lîves, leûs ovradjes èt anoncer leûs fièsses. Èt c' èst fwârt bin d' leû pôrt.

Mès cès dêrins timps, dès nûs sites walons s' droûvèt ; i n' sont nin pou prèsanter ène soce, mès sont la pou acôter lès djins èt lès fwêre lire dès ârtikes intèrèssants tout sayant d' lès fwêre rusponde, û d' lès fwêre tchandjer l' îdêye, « ku l' walon c' èst pou côser d' vîs cayèts ». Yink dès prumîs k' è sté mètu su pîd, c' è sté « L' abèrteke » da Lucyin Mahin ki nous dène tous lès mwès dès novèles èt dès ârtikes du toute sôrte (<http://aberteke.walon.org/>). È vnu in pô après, lu Wikipedia walon (<http://wa.wikipedia.org/wiki/Wikinoveles>), ki dène ôs djins l' ocâsion d' lire an walon ène anciplopedie, avu dès informâcions su tous lès domin.nes. Lès lîjeûs plèt minme prinde la plume, pou compléter lès-ârtikes, û minme sucrîre, sins s' occuper du stîle ni d' ortografe, dès bokèts tûzès pa zès minme, k' intèrèsront lès-ôtes lîjeûs, ki prèront l' plêji d' rusponde. Vous trouvrez ossi du rkèradje su nosse lingadje su : <http://walon.skynetblogs.be>



In pô pa t't-avô la Walonîe, 'la astêure ène pitite vintin.ne d' anêye, lès copin'rières vnint ô monde. On put è compter asteûre deûs douzin.nes su l' Payis. Èt bin tès' k' i gn-è ossi yène, su l' Nèt dupîs trwâs ans, avu come adrèsse : <http://berdelaedje.walon.org/>. Èle è ramplacé « viké » mètûe su pîd pa Lorint Hendschel lu novateûr. Dins l' fond dès-Ârdène, fû dès soces walones, gn-è ossi dès djins ki contèt an walon, èt k' alèt su l' Nèt. Alez in pô vèy su [www.tchiquette.com](http://www.tchiquette.com).

Èt pou clôre nosse tûzadje, dju v's-anonce la vnûe ô monde d' ène tévé bin walone su l' Nèt, avu dès ptit films ku v' plez rwêter su voste indjole. Clitchez su <http://www.youtube.com/user/wlntv>, èt vous pôrez fé vosse tchwès inte ène douzin.ne du film avu dès tchansons, du tourisme, du tàyâte.... V' wèyez bin mès djins, k' i gn-è co dès nûs cayèts ki s' fujèt an walon.

Pierre OTJACQUES